

**Kerajaan Dijangka Beri Peruntukan Besar Di Luar Bandar Dalam Belanjawan 2013
– Shafie
Bernama
09 Julai, 2012**

KOTA MARUDU, 9 Julai (Bernama) -- Kerajaan berkemungkinan mengumumkan berita gembira dengan sejumlah peruntukan yang besar untuk masyarakat di luar bandar dalam Belanjawan 2013 bagi memastikan pembangunan yang seimbang untuk merapatkan jurang pembangunan antara kawasan itu dan bandar.

Menteri Kemajuan Luar Bandar dan Wilayah Datuk Seri Mohd Shafie Apdal berkata kesemua perkara yang dilakukan Perdana Menteri Datuk Seri Najib Tun Razak adalah semata-mata untuk kebaikan rakyat selaras dengan gagasan yang diinspirasikannya bagi memastikan rakyat diutamakan.

Perdana Menteri akan terus membela masyarakat luar bandar dan selaku Menteri Kewangan, beliau akan menyediakan peruntukan yang ketara untuk terus mengimbangi antara kemajuan negara dan membela nasib rakyat, katanya kepada pemberita selepas merasmikan Pesta Moginakan Kimaragang peringkat negeri Sabah.

Pesta itu dianjurkan Persatuan Kimaragang Sabah Bersatu di Kampung Samparita, Ulu Bengkoka, kira-kira 30 kilometer dari pekan Kota Marudu di sini, Isnin.

Acara Moginakan atau kenduri besar-besaran ini merupakan satu acara unik yang dijayakan oleh suku kaum Kimaragang bagi menggantikan Pesta Kaamatan dan Rumah Terbuka Kimaragang yang diraikan setiap tahun.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=679177>